

City & Guilds

# Cymhwyster Lefel 2 Iechyd a Gofal Cymdeithasol: Craidd

Deunyddiau Dysgu - Astudiaeth Achos  
Plant a Phobl Ifanc - Harri

Chwefror 2024



# DIWEDDARIAD CHWEFROR 2024

## Deunyddiau Dysgu - Astudiaeth Achos

### Astudiaeth Achos - Harri

### Unedau 002 a 005

#### **Diweddarwyd Chwefror 2024:**

Nid yw’r astudiaeth achos hon a’r papurau prawf cysylltiedig bellach yn rhan o’r meini prawf asesu ar gyfer cymhwyster lechyd a Gofal Cymdeithasol: Craidd 8040-02.

Mae’r deunyddiau hyn wedi’u darparu i gefnogi canolfannau ac ymgeiswyr at ddibenion asesu ac adolygu ffurfiannol yn unig.

I gael y wybodaeth ddiweddaraf am y cymhwyster lechyd a Gofal Cymdeithasol: Craidd a diweddariad strategaeth asesu Ionawr 2024, ewch i:[\[Update\] Changes to Level 2 HSCCC Core assessments | Health and Care Learning Wales](#).

Mae’r llyfryn hwn yn cynnwys yr astudiaeth achos **yn unig**.

Ar gyfer papurau prawf cysylltiol lawr lwythwch:

Astudiaeth Achos Cwestiwn Set A Plant a Phobl Ifanc - Harri

Astudiaeth Achos Cwestiwn Set B Plant a Phobl Ifanc - Harri

Astudiaeth Achos Cwestiwn Set C Plant a Phobl Ifanc - Harri

## Astudiaeth Achos – Harri

Rydych chi'n mynd i ddarllen astudiaeth achos am Harri sydd ar fin symud i mewn i leoliad preswyl dros dro o'r enw Hazel Grove.

Byddwch chi'n darllen am y bobl ganlynol fel rhan o'r astudiaeth achos hon:

Harri	Y person ifanc sydd ar fin symud i mewn i Hazel Grove
Rhoswen	Mam Harri
Lowri	Gweithiwr allweddol yn Hazel Grove
Morgan	Gweithiwr allweddol yn Hazel Grove
Philip	Rheolwr cofrestredig yn Hazel Grove

Dydy'r astudiaeth achos hon ddim yn seiliedig ar sefydliad nac unigolion go iawn.

Mae Harri yn 15 oed ac yn unig blentyn. Bu farw ei dad ddwy flynedd yn ôl ar ôl dos gormodol o gyffuriau. Mae ei fam, Rhoswen, wedi cael diagnosis o ganser ac yn mynd i'r ysbyty i gael llawdriniaeth fawr. Cymraeg yw iaith gyntaf Rhoswen, ac mae Harri yn ddwyieithog. Does dim aelodau teulu eraill fyddai'n gallu gofalu am Harri, felly mae'r teulu wedi cael eu cyfeirio at y gwasanaethau cymdeithasol.

Mae gweithiwr cymdeithasol wedi cyfarfod â Rhoswen a Harri ac wedi llunio cynllun gofal a chefnogaeth sy'n cynnwys lleoliad dros dro yn Hazel Grove, lleoliad preswyl sy'n darparu gofal tymor byr i bobl ifanc â golwg ar eu dychwelyd adref neu eu paratoi am ofal maeth neu breswyl tymor hir.

Mae Rhoswen yn anhapus am Harri yn byw mewn cartref plant ar ôl darllen erthyglau newyddion am ofal gwael mewn cartref arall. Fodd bynnag, does dim lleoliadau maeth addas ar gael ac felly mae hi'n cytuno'n gyndyn i adael i Harri symud i Hazel Grove. Dydy Harri ddim eisiau bod 'mewn gofal' ond byddai'n well ganddo fod mewn lleoliad preswyl na gyda theulu arall. Mae rheolwr Hazel Grove yn ymweld â Harri a Rhoswen yn eu cartref. Maen nhw'n cytuno y bydd y lleoliad yn addas i anghenion Harri. Bydd anghenion Harri a'i opsiynau ar gyfer y dyfodol yn parhau i gael eu hasesu yn ystod ei gyfnod yn Hazel Grove. Bydd hefyd yn cael ei gefnogi i fynychu ei ysgol uwchradd sydd o fewn pellter teithio i'r lleoliad.

Mae ysgol Harri'n ffynhonnell bwysig o sefydlogrwydd yn ei fywyd. Mae ei athrawon yn gadarnhaol am ei agwedd at waith ysgol a'i siawns o lwyddo yn arholiadau'r flwyddyn nesaf. Fodd bynnag, maen nhw'n dweud ei fod wedi bod yn eithaf encilgar ar ôl marwolaeth ei dad.

I sicrhau bod symudiad Harri i Hazel Grove yn digwydd mor esmwyth â phosibl, mae'r gweithiwr cymdeithasol yn trefnu mynd â Harri a Rhoswen i ymweld â Hazel Grove i edrych o gwmpas a gweld ei ystafell.

Yn Hazel Grove, mae'r gweithwyr allweddol Morgan a Lowri wedi cael eu dyrannu i weithio gyda Harri. Mae Lowri wedi dechrau gweithio yn y lleoliad yn ddiweddar ac wedi cwblhau'r rhaglen ymsefydlu. Hon yw swydd gyntaf Lowri mewn gofal preswyl felly bydd yn cysgod Morgan ac yn gweithio ochr yn ochr ag ef; mae Morgan wedi gweithio yn y lleoliad ers pum mlynedd ac ef fydd gweithiwr allweddol Harri. Mae Lowri'n ddwyieithog (Cymraeg a Saesneg). Mae Morgan wrthi'n dysgu Cymraeg a dim ond ychydig bach mae'n ei siarad ar hyn o bryd.

Mae'r ymweliad â Hazel Grove wedi'i drefnu ar ddiwrnod pan fydd Lowri a hefyd Morgan yn gweithio shifft. Yn anffodus, oherwydd ei salwch, dydy Rhoswen ddim yn gallu mynd. Ar ôl darllen nodiadau'r ymweliad cartref, mae Morgan a Lowri'n croesawu Harri a'i weithiwr cymdeithasol i'r cartref. Maen nhw'n cyflwyno eu hunain, yn dangos y lle i Harri a'i weithiwr cymdeithasol ac yn eu cyflwyno nhw i'r bobl ifanc a'r gweithwyr eraill. Mae Lowri'n sylwi bod Harri'n ymddangos yn anghyfforddus ac nad yw'n rhyngweithio â'r bobl ifanc sy'n bresennol.

Mae Lowri a Morgan yn dangos ystafell Harri iddo ac yn cymryd y cyfle i ddod i'w adnabod ychydig yn well. Maen nhw'n darganfod bod Harri'n poeni am iechyd ei fam ac mae Morgan yn gofyn i Harri a hoffai i Lowri fynd gydag ef i ymweld â hi'n rheolaidd tra ei bod hi yn yr ysbyty. Mae Harri'n dweud "hoffwn". Mae Harri hefyd yn poeni y bydd y bobl ifanc eraill yn y cartref yn gwybod sut gwnaeth ei dad farw. Yn y gorffennol, mae wedi cael ei fwlio oherwydd hyn. Mae Morgan yn tawelu meddwl Harri na fyddai'r staff byth yn rhannu gwybodaeth bersonol â phobl ifanc eraill. Mae Morgan yn dweud wrth Harri ei fod yn gwybod y byddai colli ei dad wedi bod yn anodd. Mae Harri'n nodio ac yn edrych i lawr ar y llawr. Mae Morgan yn rhoi ei law ar ysgwydd Harri ac yn tawelu ei feddwl y bydd holl staff Hazel Grove yn gweithio gyda'i fam, ei weithiwr cymdeithasol a'i ysgol i wneud yn siŵr ei fod yn ddiogel ac yn cael gofal da.

Mae Lowri'n gofyn i Harri beth mae'n hoffi ei wneud y tu allan i'r ysgol. Mae Harri'n dweud ei fod yn chwarae pêl-droed gyda'i dîm lleol. Mae Lowri'n dweud ei bod hi hefyd yn chwarae pêl-droed ac yn gofyn a fyddai'n hoffi iddi ei helpu i fynd i sesiynau hyfforddi a gemau pan fydd yn Hazel Grove. Mae Harri'n falch iawn ei fod yn cael parhau i chwarae. Mae Lowri'n gofyn a hoffai help i ddod â mwy o eiddo o'i gartref ac i bersonoli ei ystafell. Mae ef yn falch ac yn cytuno.

Mae Morgan yn esbonio i Harri, pan fydd yn symud i Hazel Grove, y bydd yn gweithio gydag ef a gweithwyr eraill i ddatblygu cynllun personol. Mae Morgan yn awgrymu bod Lowri'n gwneud cofnod o'r arsylwadau a thrafodaethau allweddol o ymweliad Harri. Mae'n cynghori y bydd hyn yn ei helpu hi i gefnogi Harri a datblygu ei gynllun personol.

Yn nes ymlaen y diwrnod hwnnw ar ôl i Morgan a Lowri adael, mae Rhoswen yn ffonio'r lleoliad i weld sut aeth yr ymweliad. Er bod y ffôn yn cael ei ateb yn Gymraeg mae'r atebwr yn esbonio nad oes siaradwr Cymraeg rhugl ar shifft, felly mae Rhoswen yn ymdrechu i barhau â'r sgwrs yn Saesneg. Mae hyn yn cael ei gofnodi yn y cofnod dyddiol ac mae Lowri'n gweld hwn y diwrnod wedyn.

Mae Lowri'n cyfarfod â Philip, y rheolwr cofrestredig, i gael goruchwyliaeth. Mae hi'n sôn am yr ymweliad ddoe ac yn dweud ei bod hi'n pryderu bod Harri'n dawel ac yn encilgar iawn. Mae hi wedi bod yn meddwl am sut mae wedi ymdopi â marwolaeth ei dad a'i fod yn siŵr o fod yn bryderus am iechyd ei fam. Mae Philip wedi cadarnhau y byddai'n trafod y pryderon hyn gyda gweithiwr cymdeithasol Harri.

Mae Lowri'n sôn am y ffaith nad oedd siaradwr Cymraeg ar gael pan ffoniodd Rhoswen y lleoliad. Mae Lowri'n gofyn a fyddai'n ddefnyddiol rhoi gwybod i fam Harri pryd mae hi ar shifft.

Mae Philip yn helpu Lowri i adfyfyrio ar y camau sydd wedi cael eu cymryd i helpu Harri i deimlo'n fwy diogel, er enghraifft, drwy wneud yn siŵr ei fod yn gallu parhau i fynychu'r un ysgol, parhau i chwarae i'w dîm pêl-droed lleol ac ymweld â'i fam yn yr ysbyty. Cadarnhaodd Philip y byddai'n trafod y pryderon hyn â gweithiwr cymdeithasol Harri ac awgrymodd y byddai o gymorth pe bai'n cyfarfod â Lowri a Morgan gyda'i gilydd yn rheolaidd er mwyn

adolygu cynnydd Harri. Awgrymodd hefyd fod Lowri'n darllen am brofiadau pobl ifanc o brofedigaeth ac mae'n bwcio lle ar gwrs iddi.